

URDHËR
Nr. 18, datë 9.2.2024

PËR DELEGIM TË KOMPETENCAVE

Në mbështetje të pikës 4, të nenit 102, të Kushtetutës; të ligjit nr. 9000/2023, “Për organizimin dhe funksionimin e Këshillit të Ministrave”; të neneve 28 dhe 29, të ligjit nr. 44/2015, “Kodi i Procedurave Administrative i Republikës së Shqipërisë”; të pikave 2 dhe 3, të nenit 11, të ligjit nr. 90/2012, “Për organizimin dhe funksionimin e administratës shtetërore” dhe të ligjit nr. 125/2013, “Për koncesionet dhe partneritetin publik privat”, të ndryshuar,

URDHËROJ:

1. Delegimin e kompetencave të titullarit të Ministrisë së Financave, zëvendësministres së Financave, znj. Vasilika Vjero, si vijon, për:

a) mbikëqyrjen e komunikimit institucional me autoritetet kontraktuese, në funksion të raportimit të rregullt periodik të ecuresë së zbatimit të kontratave koncesionare/PPP, fushë e tyre e përgjegjësisë, te ministri përgjegjës për financat;

b) vlerësimin, sipas rastit, për dhënien e rekomandimeve ndaj autoriteteve kontraktuese, bazuar në raportet e monitorimit të ecuresë së zbatimit të kontratave koncesionare/PPP, për marrjen e masave për përmirësimin e performancës dhe minimizimin apo eliminimin e risqeve të drejtpërdrejta e të tërthorta që ndikojnë në buxhetin e shtetit;

c) mbikëqyrjen e procesit të hartimit të draftraportit vjetor të përmbledhur mbi ecurinë e kontratave aktive të koncesionit/PPP, si aneks i raportit vjetor të zbatimit të buxhetit, në përputhje me legjislacionin në fuqi për menaxhimin e sistemit buxhetor, nga strukturat përgjegjëse të ministrisë, dhe siguron përcjelljen te ministri për miratim;

d) mbikëqyrjen e procesit vjetor të monitorimit të ecuresë së zbatimit të kontratave koncesionare/PPP të cilat janë fushë e përgjegjësisë së Ministrisë së Financave, me qëllim hartimin e raporteve vjetore përkatëse;

e) koordinimin e punës me strukturat përgjegjëse të ministrisë, të kërkesave të autoriteteve kontraktuese për vlerësimin dhe miratim paraprak të projekteve koncesionare/PPP, çdo ndryshim apo transferim të tyre;

f) koordinimin e punës me strukturat përgjegjëse të ministrisë, për draftkontratat koncesionare/PPP të paraqitura nga autoritetet kontraktuese, për vlerësim dhe miratim paraprak pas përfundimit të procedurave të konkurrimit dhe përpara miratimit përfundimtar nga ana e tyre me partnerin privat;

g) ndjekjen e punës me strukturat përgjegjëse të ministrisë, për shqyrtimin e marrëveshjeve dhe kontratave shtesë dhe/ose të kushtëzuara, marrëveshjet e drejtpërdrejta, të njoftuara paraprakisht për mendim nga autoritetet kontraktuese;

h) trajton kërkesat e autoriteteve kontraktuese për zgjidhje kontrate, duke dhënë mendimin pas koordinimit dhe vlerësimit të strukturave përgjegjëse të ministrisë.

2. Urdhri nr. 294, datë 29.12.2023, i ministrit të Financave dhe Ekonomisë “Për delegimin e kompetencave”, shfuqizohet.

3. Ngarkohet zëvendësministria e Financave, znj. Vasilika Vjero, për zbatimin e këtij urdhri.

Ky urdhër hyn në fuqi menjëherë dhe botohet në Fletoren Zyrtare.

MINISTËR I FINANCAVE

Ervin Mete